



5

Niining Leksyona Matun-an Mo Kini

Ang Pag-ayo Sa Usa Ka Masakiton Didto sa Tuburan

Ang Kagahum sa Anak

Ang Mga nagapanghimatuod Mahitungod Kang Jesus

ANG PAG-AYO SA USA KA MASAKITON DIDTO SA TUBURAN

(Basaha ang Juan 5:1-18)



Ang capitulo 5 nagahisgut mahitungod sa tawo nga nasakit sulod na sa 38 ka tuig. Dihay usa ka tuburan diin ang katawhan mahimong mamaayo, Apan sa panahon nga kutawon na kini sa usa ka manulonda, ang labing unang tawo lamang nga makaabut sa tubig maoy mamaayo. Kining tawhana dili gayud makadali ug adto sa tuburan aron unta mamaayo siya. Apan giayo siya ni Jesus.

Ang pipila sa mga kadagkuan sa relihiyon nangasuko tungod kay giayo man ni Jesus kining tawhana sa adlaw sa igpapahulay kon Sabado. Naghimo sila sa Sabado ingon nga adlaw sa pagsimba, ug wala magatoo nga dunay bisan unsang buhat nga pagahimoon sa maong adlaw. Naghunahuna kining maong mga kadagkuan mahitungod sa pagdala sa tawo sa iyang higdaanan sa adlaw nga Sabado labaw kay sa milagro nga nakapalakaw kaniya. Naghunahuna sila sa ilang gikabilinbilin nga kalagdaan labaw pa kay sa tawo nga nagkinahanglan ug tabang.

Tinuod nga usa ka adlaw sa semana kinahanglan gamiton alang sa pagsimba. Dili kita maga-buhat sa mga buluhaton nga dili kaayo kinahanglanon nianang adlaw. Apan maayo gayud kanunay ang pag-

tabang sa katawhan nga anaa sa pagkinahanglan. Miingon si Jesus, "Ang akong Amahan nagapadayon sa pagbuhat bisan pa hangtud karon ug ako nagabuhat sa ingon man." Kon ang Dios dili magbuhat sa matag adlaw sa semana, mangamatay kitang tanan.

Buhata Kini

1. Nganong didto man ang masakiton sa tuburan sa Betsata?
 - . . . a) Buot siyang moinom ug tubig.
 - . . . b) Buot siyang mamaayo.
 - . . . c) Buot siyang maligo.
2. Nganong nasuko man ang mga kadagkuan sa relihiyon?
 - . . . a) Tungod kay wala sila bayari alang sa kaayohan.
 - . . . b) Tungod kay ang pag-ayo wala himoa sa usa ka doktor.
 - . . . c) Tungod kay nag-ayo si Jesus ug usa ka masakiton sa adlawng Sabado.
3. Giunsa man ni Jesus pagtubag ang mga kadagkuan sa relihiyon?
 - . . . a) Gisultihan Niya sila nga nagapamuhat Siya tungod kay nagapadayon man ang Iyang Amahan sa pagbuhat.
 - . . . b) Gisultihan Niya sila nga ang pag-ayo sa masakiton dili buhato trabaho.
 - . . . c) Gisultihan Niya sila nga nakadawat siya ug pagtugot gikan ni Juan Bautista.

ANG KAGAHUM SA ANAK (Basaha ang Juan 5:19-29)

Gihatagan sa Dios ang Iyang Anak nga si Jesus sa gahum ug katungod sa pag-ayo sa masakiton, pagbanhaw sa mga minatay, ug sa pagpasaylo sa sala, ug bisan pa gani sa paghukom sa kalibutan. Ang bersikulo 24 nagahatag ug usa ka maanindot nga saad nga ang tanan nga magapatalinghug sa mga pulong ni Jesus ug mosalig Kaniya dili na pagahukman pa tungod sa ilang mga sala. Naluwas na sila gikan sa ilang mga sala ug gikan sa silot sa sala. Nakadawat na sila sa kinabuhing dayon. Dili na kinahanglang moatubang pa sila kang Jesus sa adlaw sa paghukom sa kalibutan tungod kay nagsalig na man sila Kaniya ingon nga Manluluwas.

Buhata Kini

4. Sag-uloha ang Juan 5:24
5. Kinsa man ang dili na pagahukman ni Jesus tungod sa ilang mga sala?
 - . . . a) Sila nga nahimo nang sakop sa usa ka simbahan.
 - . . . b) Sila nga wala gayud makahimo ug dautan.
 - . . . c) Sila nga nagapatalinghug sa mga pulong ni Jesus ug nagsalig Kaniya ug sa Dios.

ANG MGA NAGAPANGHIMATUOD MAHITUNGOD KANG JESUS

(Basaha ang Juan 5:30-47)

Kining capituloha nagahisgut sa mga naga-panghimatuod kang Jesus. Kining mga nagapanghimatuod mahitungod Kaniya nagapamatuod usab kon kinsa Siya. Silang tanan niining capituloha nagapahibalo kanato nga si Jesus mao ang Anak sa Dios.

Si Juan nga Bautista usa niining mga naga-panghimatuod (bersikulo 33). Ang mga buhat-nga gibuhats ni Jesus nagapanghimatuod usab mahitungod Kaniya (bersikulo 36), nagapamatuod nga anak Siya sa Dios. Ang amahan nagahatag usab ug panghimatuod (bersikulo 37). Ug unya ang nahisulat nga Pulong sa Dios isa usab ka panghimatuod (bersikulo 39). Si Jesus dili kasarangan nga tawo. Siya mao ang pinadala sa Amahan aron paghatag sa kaluwasan ug kinabuhing dayon.

Buhata Kini

6. Itandi ang imong mga tubag sa hustong mga tubag nga anaa sa katapusan niining leksyona.
7. Sulati ang imong Rekord sa Estudyante alang sa ika-5 nga leksyon.

Mga Tubag sa Ika-5 nga Leksyon

Kon duna kay 4 ka mga hustong tubag, markahi ang imong grado ug labing maayo; kon 3 ra, markahi ug maayo. Kon 2, kasarangan, Kon kubos sa 2 ang imong hustong mga tubag, basaha pag-usab ang leksyon.

1. b) Buot Siyang Maayo
2. c) Tungod kay nag-ayo si Jesus ug usa ka masakiton sa adlaw nga Sabado.
3. a) Gisultihan Niya sila nga nagapamuhat Siya tungod kay nagapadayon man ang Iyang Amahan sa pagbuhat.
5. c) Sila nga nagpatalinghug sa mga pulong ni Jesus ug nagsalig Kaniya ug sa Dios.

Gidaghanon sa Hustong Mga Tubag _____

Grado _____